

木石居精校八朝偶集

木石居精選八朝偶雋卷之五

句吳蔣一葵仲舒父原纂

吳興茅元銘鼎叔父重訂

宋

治平中英宗患歷代史繁令司馬光編進君臣事
跡光請置局辟官與劉攽劉恕范祖禹及子康編
集神宗賜名資治通鑑會光出知永興軍以衰病
乞間乃差判西京留司御史臺及提舉崇福宮前

後六任聽以書局自隨。歷十九年成書。元祐初光
還朝。作門下侍郎。用宰相蔡確劄子。方下國子監
開板。杭州雕造。令光門下士及館職校讐之。板成
遍賜宰執侍從及校讐官。各以表謝。獨張舜民表
能盡著書始終。畧見通鑑本末。其辭曰。英宗皇帝
患學者不能遍窺。况人主何暇周覽。思有所述。頗
難其人。疇若臣哉。莫如光者。神宗皇帝揮宸翰以
錫名。勅講筵而進讀。目爲通鑑。時則弗迷。資彼治

原捨茲安出。又曰。上下馳騁于數千載間。出入相
隨于十九年內。尚假言官之督責。熟諳里俗之謗
嗤。卒成一代之書。仰副兩朝之志。雖古者興亡事
迹。固已粲然。而光之筋力精神。于此盡矣。又曰。旅
遊東國。嘗屢歎于斯文。留滯周南。遂克終于先業。
嗟君臣之際遇。已極丹青。何父子之淪亡。忽悲風
露。舜民又有謝祖禹詩云。通鑑初成。賜近臣。不遺
疎賤。帝恩均。我投湘水五千里。君住周南二十春。

東觀汗青身是夢。西齋削藁事如新。細論當日修書者。祇有三人今一人。謂敘恕祖禹也。祖禹時爲講筵。舜民爲臺官云。

司馬公永興謝上表云。維此咸秦。昔爲畿甸。山川秀美。土地膏腴。論其平時。誠爲樂土。在于今日。適值凶年。經夏亢陽。苗青乾而不秀。涉秋淫雨。穗黑腐而無收。廩食一空。家乏蓋藏之粟。襁負相屬。道有流離之人。老弱懷溝壑之憂。姦滑蓄萑蒲之志。

正宜安靜。不可動搖。譬諸烹魚。勿煩擾。則免于糜爛。如彼種木。任生植。則自然蕃滋。讀此篇。憂國憂民。可以泣鬼。真有用文章也。公平日。謂不能爲四六。豈誠不能爲。特不能爲雕人刻士耳。

神宗初卽位。王中父介。劉貢父攷。同考試進士。中父以舉人卷子用小畜字。疑畜字與御名同音。貢父爭以爲非。中父不從。固以爲御名。貢父曰。此字非御諱。乃中父家之諱也。因相詬罵。旣出試院。御

史以爲言。貢父坐罷同判太常禮院。罰銅歸館。有啟謝執政云。虛船觸舟。忤心不怨。強弩射市。簿命何逃。一時稱其工。

李復圭自慶州以軍變事左遷。知曹州。謝表曰。誤蒙恩制。更守陋邦。神宗赫怒。云曹股肱郡。乃爲陋邦。不遜如此。乃知廣濟軍。劉貢父自修起居注。守曹南。謝表云。薄淮陽者。願留禁闕。厭承明者。樂在會稽。臣不敢然。仕本爲祿。亦不足之語。但婉而成。

章耳。

蘇子瞻賦十歲時。見老蘇誦歐陽公謝對衣并馬表。老蘇曰。汝可擬作一聯。曰。匪伊垂之。帶有餘非敢後也。馬不進。老蘇喜曰。此子他日當自用之。至元祐中。再召入院作承旨。因有此賜。用爲表謝云。枯羸之質。匪伊垂之。而帶有餘。歛退之心。非敢後也。而馬不進。後爲兵部尚書。又作謝對衣帶表畧曰。物生有待。天地無窮。草木何知。冒慶雲之渥采。

魚鰕至陋。借滄海之榮光。雖若可觀。終非其有。四
六至此。涵造化妙旨矣。

東坡謝賜對衣金帶馬非一。俱警策可誦。有曰。陛
下至誠。樂與有緇衣之好賢。俊民用章。無白駒于
虛谷。不違寒陋。亦被光華。攬佩以思。遂識斷金之
義。舉鞭自誓。敢忘希驥之心。有曰。命服出苛。榮動
縉紳。左驂在庭。光生徒馭。慨然攬轡。敢有意于澄
清。束以立朝。尚可言于賓客。有曰。臣山野之資。非

文繡之所及。疲駑之質。雖鞭策以何加。方祈冗散之安。更忝便蕃之錫。據鞍有愧。束衽知榮。敢不奉以牧民。永思去害之措施。之治邑。庶無學製之傷。有日子。衣安吉。不待請而有之。我馬虺隤。蓋知勞而賜者。敢不勉思忠盡。務報恩勤。永爲廐庫之珍。莫非民力。無忘獄市之寄。以副上心。

東坡又有謝賜衣襖表云。齊官三服。已寬卒歲之憂。漢札十行。更佩先春之煖。惟德其物。豈曰無衣。

敢不推廣朝廷之仁。益收凍餒。申嚴祖宗之法。少
肅情。媮。庶。收。汗。馬。之。勞。以。解。濡。鵠。之。誚。

四六不得用經全句。惡其近賦也。然子瞻作呂申
公制云。既得天下之大老。彼將安歸。乃至國人皆
曰。賢夫。然後用。氣象雄傑。格律超然。固不可及。

呂惟仲誨性沉厚。剛果遇事無所回屈。身幹長丈
而方望之偉然。東坡每戲之曰。公真有大臣體。此
坤六二所謂直方大也。及拜相東坡草麻云。果藝。

而達有孔門三子之風。直大以方得坤爻六二之動。呂以爲謔已憾焉。

蘇子瞻與呂吉甫愚卿同在館中。吉甫旣爲介甫腹心進用。而子瞻外補。遂爲仇讐矣。元祐初。子由作右司諫。論吉甫之罪。莫非蠹國殘民。至比之呂布。自資政殿大學士貶節度副使。安置建州。而子瞻作中書舍人。行謫詞。又劇口詆之。號爲元凶。其詞曰。先皇帝求賢如不及。從善如轉圜。始以帝堯。

之明姑試伯鯨終焉孔子之聖不信宰予尚寬爾
觀之誅薄示三苗之竄吉甫既至建州謝表末曰
龍鱗鳳翼固絕望于攀援蟲臂鼠肝一冥心于造
化以子瞻兄弟與我所爭者蟲臂鼠肝而已子瞻
見此表于邸報笑曰福建子難容終會作文字
子由代子瞻作中書舍人啟稱伏念某草茅下士
蓬華書生子瞻以筆圈伏念某用但卑末三字
蘇子瞻作翰林林子中希方以言者去國在外以

啟賀曰父子以文章名世盡淵雲司馬之才兄弟以方正決科邁晁董公孫之學與其後爲中書舍人謫二蘇告詞之語異矣。

蒲傳正在翰林因入對神宗曰學士職清地近非它官比而官儀未寵自今宜加佩魚遂著爲令東坡入翰林謝表曰詔語春溫再命而僕使華天降一節以趨起用成語妙甚又曰雖職親事祕號爲北門學士之榮而祿薄地寒至有京兆掾曹之誚

豈如聖代一振儒風。非徒好爵之縻。兼享大烹之
養。玉堂賜篆。仰淳化之彌文。寶帶重金。佩元豐之
新渥。蓋淳化中。太宗嘗御書玉堂之署四字扁。翰
林院故事。學士賜御仙花帶。而不佩魚。惟二府佩
之。號曰重學士得佩。則元豐新制也。

東坡謝兼侍讀表曰。以爲兄弟之同升。自是朝廷
之盛事。承明三入。僅比古人。大雅一門。無慙舊史。
時穎濱已居政地。不許引嫌故也。

東坡受知神廟。雖謫而實欲用之。東坡微解此意。
論賈誼謫長沙事。蓋自況也。在元祐間。獲魁章作
告裕陵文云。將帥用命。爭酬未報之恩。神靈在天。
難逃不漏之網。後人輒謂東坡以微文謗訕夫寧
有是。

東坡嘗夢數吏持紙一幅。其上題云。請祭春牛文。
因取筆疾書云。三陽既至。庶草將興。爰出土牛。以
戒農事。衣被丹青之好本。出泥塗成毀。須臾之間。

誰爲喜愠吏微笑曰此兩句復當有怒者傍一吏云不妨不妨此是喚醒它。

宋人有祭勾芒神文曰天子令我盡收南海之民農人告予將有西疇之事念銅虎謹頒春之職出土牛示嗣歲之期此當是帥廣所作意雖與東坡不同而詞語瓌妙則似之

子瞻在徐州日河水浸城幾至淪陷子瞻日夜守捍得全其賀表云維豐沛之大澤實汴泗之所鍾。

伊昔橫流凜孤城之若塊。殆茲平定。蔚秋稼以如雲。

子瞻謝量移汝州表云。隻影自憐。命寄江湖之上。驚覓未定。夢遊縲紲之中。憔悴非人。猖狂失志。妻孥之所竊笑。親友至于絕交。疾病連年。人皆相傳爲已死。饑寒併日。臣亦自厭其餘生。

表章自叙。以兩臣字對說。東坡多用之。然須審度君臣之間。情義厚薄。及姓名眷顧于君前如何。乃

爲合宜。東坡湖州表云。知臣愚不適時。難以追陪
新進。察臣老不生事。或能牧養小民。登州表云。于
其黨而觀過。謂臣或出于愛君。就所短以求長。知
臣稍習于治郡。侍讀謝表云。謂臣雖無大過人之
才。知臣粗有不欺君之實。惠州表云。念臣奉事有
年。少加憐愍。知臣老死無日。不足誅鋤。凡此所言
皆可自表于君前者。後人不諳事宜。至有碌碌常
流。乍得一官。亦輒云。知臣察臣甚非體也。

汪滄溪亦多用此謝徽州云謂臣不改歲寒
越之散地察臣素推月旦故付之本州爲陸
謝給事中云知臣惟鈍無他故長奉賢王之
綢臣踐揚滋久故亟咍法從之班爲汪樞密
謝自虜中歸不令入城降詔獎諭表曰知臣
齒髮已凋常恐卸攸之無後憐臣肺腑可見
有如去病之辭家

杭頰皆有西湖東坡連鎮二州故謝啟云入叅兩

禁每玷北扉之榮。出典二邦。輒爲西湖之長。晚謫

惠州。州有豐湖。亦名西湖。淳熙中。秘書楊監使廣

東。過惠。游豐湖。賦詩云。三處西湖一色秋。錢塘潁

水更羅浮。東坡原是西湖長。不到羅浮那得休。

東坡潁州謝表曰。賓主皆賢。蓋宗資范。孟博之舊。

治文獻相續。有晏姝。歐陽修之遺風。又謝中書舍

人表曰。在唐之盛。以馬周岑文本爲得人。近世所

傳有楊億。歐陽修之故事。此以近事對古事也。後

周益公謝除兵侍兼直學士院表曰歷考正元之後。惟陸贄衛次公之並充。載稽南渡以來。有汪藻綦崇禮之故事。乃用此格。

東坡帥定武。有武臣狀極朴陋。以啟事來獻。東坡讀之喜曰。奇文也。以示幕客李端叔。問何者最爲佳句。端叔曰。獨開一府收徐庾于幕中。並用五材。走孫吳于堂下。此佳句也。視此郎睂宇決無是語。得無假諸人乎。坡曰。使其果然。固亦具眼矣。卽爲

具召之與語甚歡。一府皆驚。

紹聖初，東坡以論事爲衆所忌，頻年謫居。先奉詔命落兩職，知英州軍州事。謝表云：瘴海炎陬，去若清涼之域；蒼顏素髮，誰憐衰暮之年。續奉詔命，惠州安置。謝表云：湯網解其三面，舜干舞于兩階。明降德音，許全餘息。故使虺虺之馬，猶獲蓋帷；鰥鰥之牛，得違刀几。未幾，復責授復州別駕、昌化軍安置。謝表云：並鬼門而東驚，浮瘴海以南遷。子孫慟。

哭于江邊以爲死別。魍魎逢迎于海外。寧許生還。
徽宗初卽位。詔復元祐黨人官。徙蘇軾于內地。遂
自昌化移廉徙永。更三赦復提舉玉局觀。廉州表
云。風波萬里。顧衰病以何堪。烟瘴五年。賴喘息之
猶在。憐之者嗟其已甚。嫉之者謂其太輕。考圖經
正繫海隅。以風土疑非人世。食有併日。衣無禦寒。
凄冷一身。顛躓萬狀。恍若醉夢。已無意于生還。豈
謂優容許承恩而近徙。永州表云。先皇帝明罰勅。

法使萬里以思愆。今天子發政施仁。無一夫之失。
所玉局觀表云。沒齒何堪。不厭飯疏之陋。蓋棺未
已。猶懷結草之忠。

東坡玉局觀表。七年遠謫。不意自全。萬里生還。適
有天幸。所觀字皆漢人語也。又黃門謝復官表。一
毫以上。皆出於帝恩。累歲偷安。有慙于公議。秋毫
以上。皆帝力也。用張敖語。

東坡啟云。天雨何私。笑流行之木偶。滄溟不改。歎

自蕩之波臣。或謂天雨流行皆有來處。而滄溟自蕩。莊子本文無之。蓋謝朓辭隋王晟云。不寤滄溟未運。波臣自蕩。渤澥方春。旅酬先謝。

東坡雅意卜居吳會。其湖州謝表曰。臣頃在錢塘。樂其風土。魚鳥之性。既自得於江湖。吳越之人。亦安臣之教令。登州謝表曰。擊鼓登聞。止求自便。買田陽羨。誓畢此生。杭州到任謝表曰。始衰而病。豈非滿溢之災。乞越得杭。又過平生之望。江山故國。

所○至○如○歸○父○老○遺○民○與○臣○相○問○杭○州○謝○執○政○啟○曰○
湖○山○如○舊○魚○鳥○亦○怪○其○衰○殘○爭○訟○稍○希○吏○民○習○知○
其○遲○鈍○乞○常○州○居○住○表○云○與○其○疆○顏○忍○耻○干○求○于○
衆○人○不○若○歸○命○投○誠○控○告○于○君○父○敢○祈○仁○聖○少○賜○
矜○憐○飽○食○無○思○但○日○陶○于○新○化○杜○門○自○省○當○益○念○
于○往○愆○其○拳○拳○于○吳○會○如○此○後○自○嶺○外○歸○僑○寓○常○
州○卒○焉○

東坡死李方叔諫之曰道大不容才高爲累皇天

后土知平生忠義之心。名山大川還千古英豪之氣。當時以爲知言。

黃岡道士李思立重建東坡雪堂。何思舉額作上梁文。其畧云。歲在辛酉。蔚爲鸞鳳之棲。堂毀崇寧。奄作鼪鼯之野。又云。冲妙大師前身化鶴。嘗從赤壁之游。故事傳驚。無復廣庭之字。數語皆警策。

秦少游觀在元祐諸館職最後。自校對黃本書籍。方除正字。以啟謝諸公。當時稱之。畧云。切觀前史。

具見鄢宗。西蜀中郎。孔明呼爲學士。東海釣客。建
封任以校書。雖爲將相之品。題且匪朝廷之選用。
夫何寡陋。遽邇遭逢。三國志蜀秦宓博識。諸葛呼
爲學士。唐詩人秦系自號東海釣鰲客。張建封署
爲校書郎。蓋秦氏當家二故事也。

少游謝啟有云。始憐貧女。稍分秦壁之光。終念波
臣。爲激越江之水。此感恩之譚。至云以古人行已
之方。爲國士報君之義。千金敝帚。聊依翰墨。以自

娛一割鉛刀或冀事功之可立此誓報之語

少游又有謝中書舍人表云上潤色于訓訓下稽
叅于政理自非文章絕妙可先諸子之鳴吏術精
通能最羣工之課則何以當文臣之極任蓋宰相
之屬官伏遇皇帝陛下在宥中區統和元氣上則
承周太姒求賢之意下則納召康公用士之言耆
老畢歸俊英咸事鏤錡滿庫未忘一割之鉛刀驥
驟成羣不棄十駕之驚馬時宣仁太后臨朝故以

太奴稱頌而其文流麗無字不佳。有此文足稱此職。

少游賀呂申公啟云。太公入國。固知天下之久歸伊尹。得君。益見聖人之任重。賀司馬溫公啟云。姦邪失七箸。而自驚。忠義引壺觴。而相慶。二啟前後凡同十四語。如云。力足以扶持顛危。風足以興起貪懦。青天白日。奴隸亦知其明。璞玉渾金。鑒識莫名其器。又云。欣衆正之路開。信太平之貴塞。願稽

故事就封富民之侯。請與諸生更上得賢之頌。並
不易一字。議者謂非申溫兩公。不能當此啟。非此
啟。亦不足以當申溫兩公。

少游賀元會表云。十三月爲正。旣前稽于夏道。二
千石上壽。乃叅承于漢儀。十三月爲正月。並舊年
十二月爲數也。見白虎通。

元祐初起范蜀公鎮于家。力辭不至。其表曰。六十
三而致仕。固不待年。七十九而造朝。豈云知禮時。

文潞公年八十方以太師入爲平章軍國事覽之
笑曰景仁也不看脚下

沈存中括緣永樂陷沒謫官久之元祐中復官分
司以表謝曰洪造與物難回霜霰之餘聖恩及臣
更過天地之力又曰雖奮竭之心難伸于已廢之
日惟忠孝之志敢忘于未死之前皆新語也
鄧安惠溫伯自翰苑山帥成都謝表曰捫參歷井
敢辭蜀道之難就日望雲已覺長安之遠用李太

白語自後凡官兩川者謝表相承用此一聯。又嘗有啟云三山已到。輒爲風引而還。九關神遊。不覺夢驚而失。

紹聖乙亥詞科代嗣高麗王修貢表。其中選者首聯曰襲爵海邦。猥被承家之寵。露章天陛。聿修任土之誠。又嗣守海邦。已遠霑于聖化。踐修臣職。庶仰紹于前人。又承祧繼世。方遵守土之儀。修貢效珍。敢後充庭之禮。俱是先說襲封方及來王之意。

惟第一人黃符先說本朝首聯曰仰被王靈獲承
基緒敬修臣職敢後要荒羅疇曰中國明昌適際
聖神之運遠邦奔走宜修臣子之恭雖不及嗣王
之意亦以首言中國遂爲第二人疇中聯地瀕日
出每輪葵藿之心天濶露零亦被蓼蕭之澤二事
人用之極熟此聯稍鍊語遂爲佳句其斷句云矢
來肅慎用昭遠慕之誠弓掛扶桑永荷誕敷之德
亦好

章惇元祐初簾前爭事無禮責出知汝州錢穆父
總行詞云鞅鞅非少主之臣悻悻無大臣之節子
厚後見穆父責其語太甚穆父笑曰官人怒雜職
安敢輕行杖及紹聖初子厚拜首台翰林曾子宣
布草麻洎庭宣有赤舄几几南山巖巖之語時士
大夫語云今則几几巖巖柰鞅鞅悻悻乎未幾錢
自吏部尚書責知池州

曾子宣三直玉堂作牋表有氣而備朝廷體其賀

章子厚復資政啟曰浩若江海風波莫之動搖屹如棟梁蚍蜉無以輕撓其自南遷歸丹陽聞大觀元會作表以賀畧云九賓在列鏘劍佩而肅鴛鸞五輅在庭明旂常而載日月蓋雖老而文字不衰亦久在朝居文字職習性然也

紹聖中陸農師佃曾子開輩俱以曾預修神宗實錄被謫中書舍人林希草詞云謂爾同爲謗訕則于今其藁不存謂爾有所建明則未嘗爭論而去

人以爲得實。

陸佃謝吏部尚書表有云六燕相停。試銓衡其輕重。乙鴻遼遠。欲審別其飛翔。按九章筭術。五雀六燕。飛集于衡。衡適平。一雀一燕而異處。則雀重而燕輕。張融曰。鴻飛天首。遼遠難明。楚人以爲鳬。越人以爲乙。鴻常一耳。

曾子開預修宋史。受朝奉郎。謝表有云簡策之傳。固多帝王之書。爲重文章之用。非一述作之體。爲

難。又云自周而上。具載百篇之言。由漢以還。各成一代之史。典謨之辭略而雅。春秋之法謹而嚴。子長雖謬于是非。見稱事核。孟堅頗推于詳贍。或患文繁。史館諸人無不推其精雅。

元符末。蔡京爲學士承旨。曾肇爲學士。曾布韓忠彥並爲執政。一日中使召元長鎖院草麻。拜韓公爲左僕射。京欲標上意。徐奏請曰。麻詞未審。合作專任一相。或公作兩相之意。上曰。專任一相。翌日

京出言曰子宣不復相矣。已而復召子開。草曾公
右僕射制。子開力辭。上曰弟草兄麻。太平美事。禁
中已檢見韓絳故事矣。不須辭。子開始受命。其破
題云東西分臺左右建輔。蓋有爲而發。

隆祐復位制。蔡元長草。其詞曰。雖元符建號。已位
于中宮。而永泰上賓。無嫌于並后。陳了翁譔作蔡
彈文云。北門翰長。乃手草廢詔之人。復後麻詞。又
躬寫慈闈之旨。以謂訓出東朝。則先帝當時不得

不從事于泰陵。則陛下今日安敢輕改。

陳了翁著尊堯集累遭貶逐。蔡京再相。了翁之子正彙告京言語不順父子。追逮對獄。正彙以心疾竄海島。公移置通州。遇赦自便。謝表略曰。狐突教子。素存不貳之風。曾參殺人。寧免至三之惑。事既匿而難曉。時浸久而益疑。制所深嚴。就逮于重江之外。獄辭平允。閱實于片言之中。尋沐寬恩。移置近地。海島萬里。不如無子之無憂。淮壖一身。彌覺

有生之有患擢髮不足以數臣之罪。瀝血不足以
寫臣之心。

九符末劉元城

安世

自貶所起帥鄆當過闕公謝

表云志惟許國如萬折之而必東忠以事君雖三
已之而無愠坐是遂不得入見大觀問陳了翁在
通州編修政典局取尊堯集了翁以表繳進其語
有云愚公老矣益堅平險之心精衛眇然未捨填
波之願後竟再坐貶此二表于用事下字亦皆精

切而氣節凜凜。如嚴霜烈日云。

范忠宣純仁上遺表其略云。蓋嘗先天下而憂期。不負聖人之學。此先臣所以教子而微。臣資以事君。又云。萬里波濤。僅脫江魚之葬。五年癰瘍。幾從山鬼之游。目已不明。無復仰瞻于舜日。身猶可勉。或能親奉于堯言。又云。惟宣仁之誣謗未明。致咸佑之憂勤不顯。臣所惜者。陛下上聖之資。臣所愛者。宗社無疆之業。表旣奏。蔡京用事。下有司欲罪。

其子李端叔云代作遂廢錮終身。

謝仕伯克家參政在西掖草蔡京謫散官制大爲士大夫所稱其數京之罪曰列聖貽謀之憲度掃蕩無餘一時異議之忠賢耘鋤略盡其語出于張文潛論唐明皇曰太宗之法度廢革略盡貞觀之風俗蠹壞無餘也。

蔡元長父子旣敗言者攻之不遺餘力李泰發時爲侍御史獨不露章且勸勿爲太甚坐是責監汀

州酒稅謝表云。當垂涕止轡弓之助。人以爲狂然。臨危多下石之徒。臣則不敢。士大夫多稱之。

楊子安侍郎。坐黨籍謫官洛陽。其謝再任官祠表云。地載海涵。莫測包荒之度。春生秋殺。皆成造化之功。邸報至丹陽。蔡元度在郡。見報驚歎諷味之。王安中履道初任大名府元城主簿。呂吉甫一見奇之。未知其有文也。會熙河捷奏。令代爲賀表。其末云。方叔壯猷。顧自嗟於老矣。臯陶賡載。尚希贊。

於康哉呂尤加歎。蓋能發其微也。

王安中大燕樂語曰。五百里采。五百里衛。外包有截之區。八千歲春。八千歲秋。上祝無疆之算。

宣和中取燕山羣臣稱賀。蔡元長令一館職代作表。仍語以燕人悅。則取之一句。不得不使其人搜經句欲對未得。王安中曰。何不曰。昆夷駝其喙矣。遂用之。

蔡天啟肇紹聖元符間爲中書舍人。時嘗與元祐

諸公游。遂曹斥不復用。嘗守陸州。到任謝表有曰。
城。熊。闐。寂。一。葉。落。而。知。秋。島。嶼。縈。迴。二。水。合。而。成。
字。復。有。詩。曰。疊。章。巧。分。丁。字。水。臘。梅。遲。見。二。年。花。
人。謂。能。狀。桐。廬。郡。景。物。

蔡天啟又有明州謝到任表云。人有能有不能。聖
主量材而受職。士或去或不去。人臣秉義以事君。
臣結約無奇。間關少與。徒谿潭之醜類。素乏雄文。
羸賈客之購金。初無佳句。按韓愈爲文祭鱷魚。鱷

魚去惡溪之潭。雞林賈購。白樂天詩。一首一金。二者皆南方故事。

蔡天啟初召詔中書舍人故事。宰相於中書堂試詔制。天啟揮毫立就。文不加點。擬授節度使制云。鳴戲。千里繆之毫釐。朕不從中御也。萬世垂之。竹帛。卿其以身任之。張天覺讀之。擊節稱美。

張天覺商英既相。謝表有云。十年去國門前之雀。可羅一日歸朝屋上之烏。亦好徽宗親題所御扇。

焉

丁晉公詩屋可占烏曾貴仕門堪羅雀稱衰翁

宋惠直爲江州德化簿王彥昭出帥長沙郡守令
作樂語宴之時有王積中者知名士也爲簾幕亦
俾預席其中三聯云少年射策有賈太傅之文章
落筆驚人繼沈中丞之翰墨從來汝潁之間固多
奇士此去瀟湘之地遂逢故人況有錦帳之郎官
來爲東道且邀紅蓮之幕客共醉西園郡守讀之

大喜謂句句著題。薦于時相何清源。執中卽除書局。繼中詞科聲名籍甚。

宋新仲在王彥昭幕下。代作春日留客致語。有云。寒○食○止○數○日○間○。纔○晴○又○雨○。牡○丹○蓋○數○十○種○。欲○拆○又○芳○。皆○魯○公○帖○與○牡○丹○譜○中○全○語○也○。彥○昭○好○令○人○歌○柳○詞○。又○嘗○作○樂○語○云○。正○好○歡○娛○歌○。綠○樹○數○聲○啼○鳥○。不○妨○沉○醉○拚○。畫○堂○一○枕○春○醒○。皆○柳○詞○中○語○。

崇寧中高麗日明州海道入貢。偶乘風自江路至。

豫章其先狀云泛槎馭以尋河。遠朝天關。望桃源而迷路。誤入仙鄉。自驚漂泊之餘。獲奉笑談之雅。政和間北使謝朮實表云聘禮式陳。祝帝齡于紫闕。宸恩特異。錫仙宴于公郵。方厥包未貢之期。捧茲德惟馨之賜。天香滿袖。染湘水之清寒。雲液盈盤。浥洞庭之餘潤。梓里豈遑于遺母。楓庭切願于獻君。夷狄四六亦工如此。

近年張應雷有謝朮表云剝膚而露入心涼分

辦而漿侵甲冷清泉流齒脰萍實之非甘香霧
噴人鄙葡萄之猶澁又謝楊梅表云如珠綴樹
三春葉裏青尤似火燒林五月枝頭赭幔映石
門而龍脐交濕隨盧橘而次第以新世亦並稱
之

木石居精校八朝偶雋卷之六

句吳蔣一葵仲舒父原纂

吳興茅元銘鼎叔父重訂

宋

政和中新創禁中儼儀。有旨令翰林撰文。翟公異
汝文當直。其略曰。南正司天。無俾神人之雜。夏禹
鑄鼎以紀山林之姦。苟非聖神。孰知情狀。頃刻進
人人服其敏而工。

高平范相謝罷相表云常欲愼惜名器俾士夫輩
奔競之風不敢妄圖事功冀宗社獲和平之福翟
公巽與公書卽用此語云庶幾革奔競之風格和
平之福如公所云也

翟公巽行外國王加忌制曰宗○祖○明○常○所○以○教○諸○
侯○之○孝○大○賚○四○海○不○敢○遺○小○國○之○臣○

翟公巽以顯謨閣學士知越州建炎二年秋杭州
卒陳通等嬰城叛囚守臣殺官吏公聞變發兵援

作擒賊露布曰古者賜諸侯以弓矢使得專征用
公侯爲腹心欲其守衛三軍賈勇悉勵貔虎之師
元惡就擒卒正鯨鯢之戮暨王淵平寇朝議以公
不能成功降爲直學士又以不俟報援發常平米
賑越民饑降一官併作謝表曰欲安劉氏無嫌晁
氏之危豈比秦人坐視越人之瘠二事可謂兩盡
迨公去越越人安其政相率投牒借留公知之命
取牘來卽書其上曰固知京兆姑爲五日之留無

使稽山復用一錢之送其用事精當如此。

宣和間吳元中敏爲中書舍人給事中召還兼直
禁林制詞溫厚人多傳誦河北德音云桑麻千里
皆祖宗涵養之休忠義百年亦父老訓誨之力元
中筆也。

宣和乙巳上皇內禪吳元中建議及謝門下侍郎
表云上皇勸勤授皇圖于元子微臣攝直適視草
于禁中初無一言以贊大議君子與其不伐。

梅和勝執禮宣和初爲給事中。與時相王黼論事不合。改禮部侍郎。遂黜守蘄。復落職責守滁。王黼罷相。復職知鎮江。靖康初。以翰林學士召。其謝表有曰。喜照壁間而見。蜎乍離楓下而聞。鐘蓋照壁。喜見蜎此韓退之詩句也。下句用劉夢得詩語。夢得自武陵例召赴京。詩曰。雲雨湘江起。卧龍武陵樵客躡仙蹤。十年楚水楓林下。今日初聞長樂鐘。宣和間。順州得枸杞宿根于土中。綦北海密禮屬。

聯云靈根夜吠變異質于千年。驛騎朝馳薦聖人之萬壽。蓋荒裔沉藏之久。實王師恢復之初。物豈無知。時如有待。表進天子爲之改容。凡作表須是胸中有物。乃可展布得一篇。若平時不知枸杞爲何物焉。能造語如此。

朱孺子幼事道士王元正。居大若巖。一日汲于溪。見一花犬逐之入于枸杞叢下。掘之根形如二犬烹而食。忽覺身輕飛于峰上。古詩不知靈

吐根成狗怪得時開夜吠聲

南渡之行。綦叔厚在帝側。實代王言。詔旨所至。讀者感動。如陸宣公之在奉天也。呂忠穆以首相開督府。訓辭尤爲宏偉。有曰。盡長江表裏之封。悉歸經略。舉宿將侯王之貴。咸聽指呼。其能布宣威靈。張太國體。類此。又賀忠穆啟云。嶽降神而生申實。維周翰帝賚。弼而得說。用作商霖。

高宗駕幸平江。有旨放鄒浩。追復龍圖閣待制。綦

叔厚當行詞推上所以褒卹遺直之意。有曰言期
寤意。引裾嘗犯于雷霆。計不惜身。去國再遷于嶺
徼。又曰英爽不亡。想生氣之猶在。姦諛已死。知朽
骨之尚寒。同省舍人李正民見之曰。比吏房詞頭
皆常常除目不足。騁辭。今君爲鄉草制。良可喜也。
及錄黃具叔厚告假。而李獨直以己名行下。叔厚
戲曰。君欲掛名道鄉公制。但恐潤色非工。反爲名
累耳。李笑曰。人當知出君手。不知吾併得掠美。幸

矣。其文爲同舍所重如此。

川陝宣撫副使吳玠以功進檢校少師兩鎮節度使。蔡叔厚當制有曰。陸海神臯。旣失秦川之利。銅梁劍閣。敢言蜀道之難。言者謂秦雖淪陷而川未嘗失也。指以爲病。上知其非。公猶援唐故事。自謂失職。力引病求去。遂除知紹興。

蔡北海賀林宰啟云。山川增爽。共迎鳧舄之臨風。俗還淳。暫屈牛刀之試。謝宮祠表曰。雜宮錦于漁。

策敢忘君賜話玉堂于茅舍更覺身榮時歎其工
又一表曰欲掛衣冠尚低回于末路未先犬馬僅
邂逅于初心尤佳

秦會之罷右僕射制有云予奪在我豈云去朋黨
之難終始待卿斯無負君臣之義此綦叔厚之文
褫職告詞云聳動四方之聽朕志爲移建明二策
之謀爾材可見此謝任伯之文綦謝姻家也秦大
憾之亦不能深害初檜欲得相位揚言爲相數月

必動天下。又陳二策。欲以河北人還金。中原人
還劉豫。至是帝召叔厚入對。語以是事。播告中外。
故公制詞亦有自謂得權而舉事。當聳動于四方。
逮茲居位。以陳謀首建明于二策之語。

孫仲益視代高麗王謝賜燕樂表爲詞科第一名。
卷有云。環居島服。習聞夷韎之聲。仰睇雲門。實眩
咸池之奏。次云。監二代以敷文命。一變而典樂登
歌。下管天地。同流鼓瑟吹笙。君臣相說。次云。有懷。

疏。逃。之。臣。亦。預。分。敘。之。數。玉。帛。萬。國。干。舞。已。格。於。七。旬。簫。韶。九。成。肉。味。遽。忘。于。三。月。此。先。說。遠。夷。不。足。以。知。雅。樂。然。後。序。作。樂。之。盛。受。賜。之。寵。得。尊。中。國。體。又。云。蕩。蕩。乎。無。能。名。雖。莫。覩。宮。牆。之。美。欣。欣。然。有。喜。色。咸。與。聞。管。籥。之。音。與。登。歌。四。句。並。全。用。經。語。大。凡。詞。科。四。六。須。間。有。此。一。二。聯。則。易。入。眼。他。卷。云。徵。角。並。揚。慶。君。臣。之。相。說。塤。箎。迭。奏。與。天。地。以。同。流。因。不。全。用。故。弱。

孫仲益山居上梁文云老蟾架月上千厓紫翠之
間一鳥呼風嘯萬木丹青之表又云衣百結之衲
捫虱自如挂九節之筇送鴻而去奇語也

何文縝桌以四六知名其謝召還表云兩曾參之
是非浮言猶在一王尊之賢佞更世乃明孫仲益
謝復官啟曰兩曾參而或是或非一王尊而乍賢
乍佞語簡益工

靖康間劉中遠親作百官賀道君還京表云漢殿

上皇本是野田之叟。唐朝肅帝又非揖遜之君。何
文縝時爲中書侍郎索筆塗之用此二事。別作一
聯云。擁篲却迎陋未央之過禮。執鞚前引笑靈武
之曲恭。

何桌位中書日雙親具慶生日賜生餽謝表云。况
臣千載逢時。雙親就養。用羞甘旨。無煩潁谷之陳。
誓竭疲駑。何止翬桑之報。乃汪浮溪藻文也。
靖康間京尹程伯起謝賜山等牙簡表云。看山挂。

頗敢爲晉士之清狂上馬設囊豈有唐賢之風度
亦汪浮溪筆其末聯尤勝曰入趨表著知文竹之
非珍傳示子孫庶甘棠之不朽

李丞相綱罷京師士民伏闕撾鼓乞復用綱欽宗
遣內侍宣諭衆尚未退暨召綱入仍令綱面諭遣
之乃退浮溪有啟賀曰士訟公冤競舉首而集闕
下帝從民望令免胄以見國人蓋故事以配今事
汪嘗舉以謂人作四六要當如此

靖康末虜人立張邦昌。顏博文作赦書有無德者亡。知謳歌之已去。當仁不讓。信曆數之有歸等語。無非吠堯之辭。聞者駭愕。及以大寶歸上表云。孔子從佛肸之召。意在尊周。紀信乘漢王之車。誓將誑楚。

靖康之亂。六宮有位號者皆北去。獨元祐皇后孟氏以廢居私第。獲免。張邦昌從呂好問請。乃尊元祐爲宋太后。遣使迎康王構于濟州。汪彥章時爲

起居舍人草皇太后告天下手書曰歷年二百人
不知兵傳序九君世無失德雖舉族有北轅之釁
而敷天同左袒之心乃睿賢王越居近服漢家之
厄十世宜光武之中興獻公之子九人唯重耳之
尚在或謂帝王受命不當以重耳爲比不知太后
誥命用此却無礙情真事切足以深感人心

汪彥章代羣臣勸進康王表曰整襄城之駕早戒
修途除高邑之壇亟臨大寶力圖後效如成王小

悲之詩光復丕基邁文帝大橫之兆又表曰雖以
位爲樂非堯舜之本心然其命維新蓋周邦之舊
物又賀登極表曰必國步艱難始天地出非常之
主及治功宏濟乃子孫承罔極之休取炎精用事
之月卽藝祖興王之邦有三千同德之臣共扶鴻
業用十百卜年之數重立丕基中興之初文章與
時俱高如此

浮溪草建炎德音有曰眷我中原漢祚必期于再

復而迫于疆敵。商人幾至于五遷。又曰。惟八世祖
宗之澤。豈汝能忘。顧一時社稷之憂。非予獲已。可
謂說盡當時事情。或謂徽廟時留虜庭。不可謂八
世祖宗。後行馬忠河北經制使制曰。田野三時之
務。所至一空。祖宗七世之遺。厥存無幾。此以爲七
世。乃爲穩當。

浮溪草紹興改元。德音曰。聖人受命以宅中。莫大
邦圖之繼。王者體元而居正。盡新年紀之頒。又曰。

小雅盡廢宣王嗣服于宗周炎正中微光武系隆
于有漢詞壯而事切

建炎初募使虜庭者修職郎王倫改朝奉郎充大

金通問使浮溪行制曰朕惟疆事未寧親庭在遠

夙宵軫念庶孝悌通于神明物色求人儻忠信行

于蠻貊又曰以爾曹出公侯資兼智勇言念主憂

而臣辱何有於生如昔已佚而人勞孰當其責又

曰朕既俯同晉國用魏絳以和戎爾其遠慕侯生

御太公而歸。漢哀情苦語。可泣鬼神。第高宗肺腸未必如彥章耳。

靖康之亂。柔福公主北去。建炎四年有妄女子詣關。自稱柔福。虜中潛歸。詔老官人視之。其貌良是。問以舊宮事。彷彿能言之。高宗惻然。詔授福國長公主。下降高世榮。汪浮溪草制詞曰。彭城方急。魯元嘗困于面馳。江左復興。益壽宜充于禁衛。引用故事。莫切于此。紹興中。顯仁太后回鑾。言柔福歿。

虜中久矣。始知其詐。付詔獄執之。乃女巫也。嘗遇
宮婢言其貌酷類柔福。遂以舊宮之事告之。因而
爲詐。乃伏誅。前后賜賚四十七萬緡。籍入官。
建炎紹興間。汪彥章爲中書舍人。尋除翰林學士。
謝表云。文章雖本一技。命令實行四方。故自古禁
林之除。極當時儒者之選。矧今學士尤重他官。內
敷帝制之坦明。外應軍書之警急。學非宏博。難酬
跋燭之咨思。或淹遲將誤。掣鈴之召。旣拜職。一時

詔令多出其手。凡上所以指授諸將、感厲戰士、訓飭在位、哀閔元元之意，具載誥命之文。學士大夫傳誦，以比陸宣公焉。

紹興元年正旦，高宗在越州，帥百官遙拜二帝。浮溪撰表曰：帝堯遊汾水之陽，久忘天下；文王遇明夷之卦，益見聖人。臣自遠威，顏薦更時序，當璣衡之載，復悵旒展之猶。賒鴻鴈雖賓，莫致帛書于沙漠；風濤中阻，徒瞻雲氣于蓬萊。

汪彥章賀呂忠簡初大拜啟云方羣臣憂杞國之
天靡遑朝夕乃兩手取虞淵之日重正乾坤

浮溪行韓蘄王制有曰見無禮于君爾旣殫于忠
盡歸飲至於廟我何愛于寵褒惟功名烈士之始

終惟爵祿有邦之勸沮尚圖後效更拚前休此誅

苗劉後酬勛者有曰跪推轂而遣將軍守境旣騰

于戎捷歌出車而勞還率疇庸敢廢于邦彛縱精

兵于數路若珠走盤擠醜虜于長江如杵投曰此

破兀术後酬勛者。

王絢爲從弟投拜金人自効不允。浮溪草詔曰：昔羊舌坐誅，靡連叔向。王敦稔惡，猶赦茂宏。蓋古者君臣相與于腹心之間，未嘗以兄弟輒投于形迹之地。後王綱復官，浮溪制曰：聖人之心，如權衡之公，法無私者。君子之過，如日月之食，人皆見之。衛侯醇謹，初豈有于他腸？顏子庶幾，尚何憂于貳過？詔興中汪彥章、草高麗，不許入貢。詔云：壞晉館以

納車。庶無後悔。閉玉關而謝質。匪用前規。上稱其
得代言饋。之高麗。謝表至。上以所御白團扇親
書紫詔。仍兼綰黃麻。似六經十字。以賜縉紳。榮之。
浮溪代嘉王謝及第表曰。鵬激天潢之浪。鶯遷帝
苑之春。昔慚假寵于分茅。今喜成名于拾芥。旣與
在廷之多士同值。文興將令就傳之百男。悉從隗
始。

浮溪謝進書賜茶藥表曰。遭漢家百六之災。漫無

載籍取武城二三之策。烏足全書。分北苑之上腴。用濡燥吻。乞西山之靈劑。使制頰齒。

汪彥章賀赤烏白鵲表云。孝能致哺。煌煌儀則之新喜。必傳音。嚮嚮羽毛之潔。徊翔有煒。協周家王屋之符。粹美而真。異莊子彫陵之見。

國初楊士奇改賀白鵲一聯云。與鳳同類。踰踰

於帝舜之庭。如玉其輝。嚮嚮在文王之圃。仁

廟喜曰。此方是帝王家。白鵲適內厨。進膳遂命

內臣微以賜之

漢石建爲郎中令書奏事。事下。建讀之曰。誤書馬字與尾當五。今乃四不足一。上譴死矣。甚惶恐。汪彥章書馬者。併尾而五。常並譴憂。蓋用此事。孫仲益謝表亦有云。名節壞于謗讒。孰聽鼠牙之訟。精神銷于憂患。屢驚馬尾之書。

顏魯公自湖移刺撫州。浮溪紹興初亦自湖移撫。謝表曰。惟臨汝之故都。有魯公之遺迹。時當大曆。

來自吳興。雖賢愚比擬之。非倫然。明聖選除之所。
似奉明王十行之詔。願布隆寬。想英賢百世之風。
更思竒節。又謝表有曰。去國三年。長近蓬萊之氣。
移官千里。未離牛斗之墟。采薇遣戍。何昆吾獫狁
之足憂。細柳勞軍。知李牧廉頗之可用。下聯文意。
微有牽強。而無前數聯。恐是謝廟堂啟。

浮溪後知徽州。以宗祀赦文授新安郡侯。徽故江
鄉郡也。其謝表云。久客還家。方憇南飛之鵲。通侯

授印忽成左顧之龜。宋人泝泝以得封。望胡及此。
漢將銀黃而夸里。榮乃過之。又有謝宰相啟曰。城
郭重來。疑千載去家之鶴。交游半在。或一時同隊
之魚。

崔嗣道詞科。宇文彬代大理國王。謝賜曆日表曰。
坐明堂而朝羣后。預觀月令之布新。先諸夏而後
四夷。永賴德輝之旁燭。第三人張守云。舜齊七政。
治罔逮于嬰荒。武通八蠻。賜不聞于正朔。豈伊絕

域輒預頒時亦不減前表

建炎四年駐蹕越州。明年改元紹興。遂陞府號。後
移蹕臨安。命資政殿學士張守知府事。謝表曰。履
勾踐之故樓。厲嘗膽枕戈之志。想神禹之遺跡。服
卑宮菲食之勞。又謝賜行宮。克府治表曰。六蜚回
御想清蹕之餘音。一札疏恩。復黃堂之舊觀。家在
樓臺。真羨詩人之勝。載森兵衛。稍知州將之尊。廣
廈千間。已免震凌之患。上階三尺。尚存簡素之風。

帝蓋于宮室無所增葺也。

紹興初，胡康侯安國爲給事中，兼侍讀，專講春秋以論事忤旨，遂乞侍養許之。其謝表曰：叱馭戒塗，夢寐碧鷄之佳境；牽衣結戀，徘徊鳥鳥之深情。矧當喜懼之年，深計短長之日，牽衣結戀四字畫出依依情態，妙甚。康侯沒，子寅進文集云：丘木成陰，雖鬱春秋之志；囊書奏御，何知旦暮之逢。亦自悲歎有致。

宋朝詞科以露布命題凡四其膾炙人口者薛嘉言唐西海道破土谷渾露布曰龍駒千里越流沙青海而來鳳曆萬年頒玉朔白蘭之外秦檜唐禽頡利露布曰整王旅之雲屯依天聲而電擊氣調時豫豈容微褻之弗除地闢天開奚有纖埃之未掃

秦檜又有代宰臣賀日下有五色雲表云如蓋如盤方顯照臨之用非煙非霧共呈承戴之華休矣

祥○開○灼○乎○貺○施○臣○等○誓○勤○綿○薄○求○介○昭○明○帝○袞○長○
瞻○固○已○傾○心○于○就○望○官○名○正○久○毋○庸○紀○號○于○青○黃○
此亦詞科試卷

秦○檜○用○事○時○佞○士○盈○庭○引○古○今○而○頌○功○德○者○例○沐○
汲○獎○檜○嘗○建○一○德○格○天○閣○朝○士○有○賀○啟○曰○在○昔○獨○
伊○尹○格○于○皇○天○到○今○微○管○仲○吾○其○左○祚○檜○喜○超○擢○
之

李漢老郎有賀丞相二啟無非媚竈之語然其文

自佳。賀未相曰。際天飛之。運蚤驂。駿命之。元叶帝。
賚之。求寶冠。羣公之表。十龜成朋。曾莫助告。猷之。
益五龍爲輔。念嘗同遭變之艱。賀泰相曰。昆夷維。
其喙矣。豈云屬耆老而居岐山。周公方且膺之庶。
其會諸侯而朝洛邑。大節著乎本朝。嘗左袒以爲。
劉氏孤忠。奮乎絕域。真不食而哭秦庭。

檜初爲議狀于金師。言張邦昌不可立。願復嗣。
君以安西方。金人怒。執檜去。

李文肅又有賀秦檜進師坦啟曰推赤子于腹中。君旣同于光武。有大勲于天下。相自比于姬公。秦以爲譏已。答啟曰君旣同于光武。仰歸美報上之誠。相自比于姬公。其敢犯貪天之戒。文肅得之。不能不恐。然亦終不能加害。

王仲嶷岐公暮子也。善詞翰。尤工四六。建炎初知袁州。虜寇江西。坐失守削籍。嘗以啟于秦會之曰。黃紙除書久無心于夢寐。青氊舊物尚有意于陶

銘會之爲之開陳詔復元官

張彥實掌誥制。楊原仲並居西掖。代言多彥實與之潤色。偶戲成一毫筆絕句云。包羞曾借虎皮蒙。筆陣仍推鬼作鋒。未用吹毛強分別。卽今同受管城封。原仲以爲誚已大怒。愬于檜。檜誅言官彈之。彥實罷爲宮祠。謝表云。雖造化之有生。有殺本亦何心。然臣下之或賞或刑。咸其自取。

紹興七年。趙忠簡公鼎重修哲宗實錄書成。轉特

進呂本中草制有曰謂合晉楚之成不若尊王而
賤霸。謂散牛李之黨未如明是而去非。惟爾一心
與予同德。檜以爲破和議深恨之。

制詞中又有惟宣仁之誣謗未明致哲廟之憂
勤不顯此蓋用范忠宣遺表中語兩句但易兩
字而甚不然范辭云致保佑之憂勤不顯專指
母后而言正得其實今以保佑爲哲廟了非本
意

趙忠簡安置潮州凡五年杜門謝客時事不掛口
及移吉陽軍有謝上表曰白首何歸悵餘生之無
幾丹心未泯誓九死以不移檜見曰此老倔強猶
昔

紹興八年詔侍從臺諫詳奏和金得失胡澹菴銓
抗疏乞斬秦檜連貶竄王盧溪廷珪以詩送之曰
癡兒不了公家事男子要爲天下奇陳彥柔剛中
以啟賀之云屈膝請和知廟堂禦侮之無策張膽

論事喜樞庭經遠之有人。身爲南海之行。名若泰山之重。又云知無不言。願請尚方之劍。不遇故去。聊乘下澤之車。檜聞之。盧溪貶辰陽。彥柔貶安遠。紹興九年和議成大赦。直學士院樓炤草赦文曰。乃上穹聞悔過之期。而大金報許和之約。割河南之境土。歸我輿圖。戢宇宙之干戈。用全民命。岳武穆飛在鄂州上疏。力陳其非。有曰。臣身居將閫。功無補于涓埃。口誦詔書。面有慚于軍旅。願定謀于

全勝期收地于兩河。唾手燕雲。終欲後讐而報國。
誓心天地。尚令稽首以稱藩。疏入。檜益怒。遂成讐
隙。

紹興間。黃公度榜第三人。陳修。福建解試。四海想
中興之美賦。第五韻隔對云。葱嶺金隄。不日復廣
輪之大。太山玉牒。何時清封禪之塵。時諸郡試卷
多經御覽。高宗親書此聯。粘之殿壁。及唱名上云。
卿便是陳修。因誦此聯。凄然出淚。其年第五人方

翦解試中興。日月可冀賦。一聯云。佇觀僚屬。復光
司隸之儀。忍使須臾。咸泣山東之詔。亦經御覽。唱
名。特加一資。

紹興間。太博吳元美創獄宮。三清殿。以題梁屬黃
龜年。龜年卽解手帕濡墨。大書云。風馬雲龍。儼百
順。鈞陳之衛。金枝玉葉。拱萬齡宸極之尊。詞語鑑
澗。書法高古。吳初見公。略不經思。復疑濡筆染墨
非法。旣而雙美始大喜。心服。歸語子侄曰。此公不

特詞翰可敬。其才出人數等。

玉牒所紀。非止本支而已。凡一朝大政事。大號令。大更革。大拜罷。皆在焉。仙源積慶。特其一條耳。前此進玉牒成書表。罕能備言之。惟張于湖孝祥一表。始終對說。其辭有云。帝系勒鴻。燦科條于屬籍。聖謨啟佑。嚴訓典于寶儲。堯統漢緒。肇派別于天潢。周誥商盤。麗光躔于東壁。惟昭穆親疎之有序。與文章號令之當傳。麟趾振振。共仰宗盟之益茂。

虞書渾渾更瞻聖作之相輝其形容玉牒方爲兩盡

凡表中謝後當說竊以各隨題意如洪景盧邁代
樞密使謝賜玉帶表云竊以裴度視師服章武通
天之寶衛公戡難拜文皇于闕之珍視師戡難俱
見樞臣之意又如湯岐公思退謝賜御書周易尚
書表云竊以法始四營莫辯乎易文兼五典皆聚
此書續東魯之韋編發先秦之竹簡意廣大而莫

測辭灝噩以難窺。是也。或用事或不用事。亦無定格。

湯岐公謝賜御書周易尚書表。是詞科試卷。代守臣作者。其中警語云。刪妄論于九師。掇微言于四代。月將日就。彰聖學于祗勤。墨妙筆精。竦侯藩之瞻對。又云。垂衣裳而致治。蓋取乾坤。廣視聽以御圖。一似堯禹。祕書深刻。已參淳化之孝經。方國咸頒。遠陋漢光之手札。臣叨分符竹。獲覩寶奎八法。

難知。徒驚端勁邁偉之狀。一圻所治。願布精微。疏
通之風。洪景廬亦有警語云。八卦之說。謂之索奉。
以周旋百篇之義。莫得聞。坦然明白。又斷句云。但
驚奎壁之輝。從天而下。莫測龜龍之秘。行地無疆。
楊政除太尉。湯岐公行制曰。遠覽漢京。傳楊氏者。
四世近稽。唐室書系表者。七人。謂楊震子秉。秉子
賜。賜子彪。四世爲太尉。李德裕辭太尉云。國朝重
惜此官。二百年間才七人。其用事精確如此。

木石居精校八朝偶雋卷之七

句吳蔣一葵仲舒父原纂
吳興茅元銘鼎叔父重訂

宋

建炎初朱少章升洪忠宣陪俱衛命使虜拘在虜
庭紹興五年道君皇帝崩于五國城少章在燕山
聞之服斬衰朝夕哭爲文以祭有日歎馬角之未
生竟消雪窖攀龍髯而莫上淚灑冰天後王倫歸

傳其文至上覽之感愴忠宣在冷山諱聞北鄉泣
血卽開泰寺薦之其辭曰千載厭世莫遂乘雲之
仙四海遇音同深喪考之戚况故宮爲禾黍改館
徒饋于秦牢新廟薦衣冠招魂漫歌于楚些伏願
盛德之祀傳百世以彌昌在天之靈繼三后而不
朽故臣讀之無不掩涕者

唐竇叔向。上正靈皇后哀挽詩。有命婦羞蘋葉。都
人插奈花之句。晉史成帝時。三吳女子相與簪白。

花望之如素柰傳言天宮織女死爲之著服已而
杜后崩紹興五年寧德皇后訃音自北庭來知徽
州唐輝使休寧尉陳之茂撰祭文有云十年罹難
終弗返于蒼梧萬國銜冤徒盡簪乎白柰是時正
從徽宗蒙塵其對偶精確如此

欽宗嗣位未幾遽罹狄禍紹興末訃音入國任元
受盡言時爲下僚率縉紳爲位佛宮以致哀作疏
文曰臣等從軍以出始慙晉國之亡臣御主而還

終愧趙王之養卒。攀號靡及。摧殞何窮。義不戴天。
扣九關而無路。禮應投地。庶十方之可憑。恭願神
游超越。睿識圓明。區脫塵空。來卽寶華之法會。堯
離響滅。常聞金鼓之妙音。又疏曰。恭惟大行孝慈
淵聖皇帝。蹈千仞之淵。冰脫羣生之塗炭。皇天降
割。裔土告終。萬乘墨綬。將禦徐戎之難。六軍縞素。
咸聲義帝之冤。恭願法證三乘。趣超十地。如天子
名爲喜寂。萬有皆空。如世尊身就涅槃。一真不滅。

昔人有言讀出師表而不泣者必非忠臣余謂彼二表已堪流涕此二疏乃可痛哭

任元受有賀湯侍御鵬舉啟專言秦檜之惡其畧曰請言自古之姦臣無若亡秦之巨蠹公攘名器報微時簞食之恩擅肆刑誅箝當代縉紳之口忠臣不用而用臣不忠實事不聞而聞事不實私富貴之龍斷豈止使子弟爲卿奪造化之鑪錘乃不許人主除吏忠義扼腕知識寒心並愧漢臣初乏

朱雲之請劒。下懸唐室。未聞林甫之斲棺。元受元符。諫官伯雨之孫。可謂不愧其祖。楊誠齋謂其文孤峭而有風稜。忠鯁而有義氣。良非溢美。

洪忠宣三子。迺遵邁並。中詞科。紹興乾道間。繼入西掖。邁謝表有云。父子相承。四上鑾坡之直。弟兄相望。三陪鳳闕之遊。時有賀三洪啟云。有是父。有是子。相傳忠義之風。難爲弟。難爲兄。俱擅詞章之譽。

張魏公都督江淮軍馬會詔歸朝未至而免相洪
景伯適當制其詞曰棘門如兒戲耳庸謹秋防袞
衣以公歸兮庶聞辰告所謂兒戲者指邊將也而
讀者乃以爲詆魏公其末句曰春秋責備賢者旣
功業之維難天子加禮大臣固始終之不替所以
悵惜之意至矣

紹興間洪景嚴遵代福州謝曆日表其頌德一聯
云神祇祖考旣安樂于太平歲月日時又明章于

庶証用詩鳬鷺序及書洪範文皆未嘗輒增一字
乾道中有外郡上表謝曆采取用之以爲用事精
切景嚴笑謂曰今光堯在德壽所謂考者何哉此
大有所利害不可不審

紹興間洪景盧邁撰淵聖乾龍節疏曰應天而行
早得尊于大有象日而動偶蒙難于明夷大有卦
柔得尊位應乎天而時行左傳叔孫豹筮遇明夷
象日之動故曰君子于行彖辭云內文明而外柔

順以蒙大難亦純用本文

顯仁皇后小祥洪景盧爲慰表曰漢中天二百而興益隆大業舜至孝五十而慕獨耀前猷時高宗聖壽五十四也

洪景盧草辛巳親征詔曰惟天惟祖宗方共扶于基緒有民有社稷敢自佚于宴安又曰歲星臨于吳分定成淝水之勲閩士倍于晉師可決韓原之戰是時歲星在楚未幾金人弒亮于瓜洲帝猶未

啟行也。有作賀誅虜亮表曰。蓋瓜步既應童諶。那無天道。棘門或如兒戲。將屈帝尊。又曰。詎容去腹以實鹽政。可漆頭而爲器。二聯語壯而對切。與親征詔檄相爲伯仲。但上聯意若未順。如曰恐棘門或如兒戲。將屈帝尊。而瓜步果應童諶。那無天道。則尤爲全美。

吳璘在興元。修塞兩縣決壞渠。洪景盧爲獎諭詔曰。刻石立作三犀牛。重見離堆之利。復陂誰云兩。

黃鵠詎煩鴻郤之謚。用老杜石犀行云。秦時蜀大
守刻石立作三犀牛。及漢書翟方進壞鴻隙大陂。
童謠云。反乎覆陂。當復誰云者。兩黃鵠等語也。
乾道初。以葉頤魏杞爲尚書左右僕射。並兼樞密。
使頤初爲諫議。林安宅所擊罷去。林遂副樞密。已
而置獄其言。皆無實。林責居筠。葉乃召拜左揆。洪
景盧草制曰。旣從有北之投。亟下居東之召。有欲
爲王留者。孰明去就之忠。無以我公歸兮。大慰瞻

依之望後。顓坐冬雷罷。相容齋又當制曰。調陰陽而遂萬物。所嗟論道之非。因災異而劾三公。實負應天之愧。蓋因有諷云。

魏杞初爲宗正少卿。使金定和議。及還。慰謝甚厚。旋致大用。故景盧草杞贈父詞曰。大名之後。必大。非止其身。和我如樂之。和幸哉。有子。贈母詞曰。藏盟府之園功。不殊魏絳。城外家之宅。相重見陽元。封妻姜氏。詞曰。筮仕于晉。曰魏方開門戶之祥。取。

妻必齊之姜孰盛閨闈之美。

乾道甲午改元純熙既已布告天下景盧時守贛
賀表云天永命而開中興方茂十年之統時純熙
而用大介載新紀號之年迨詔至乃爲淳熙蓋以
出處有告成大武之語故不欲用。

洪景盧代樞密使謝玉帶表有云從枕席以過師
未達戎韜之略執干戈而衛社莫參盟府之勲遽
膺一札之書申賁萬鎰之寶有璞于此必使斲恍

驚制作之工。匪伊垂之。則有餘。允謂便蕃之賜。于
玉比德。雖君子之莫追。束帶立朝。庶嘉賓而可對。
昔人謂將帥表須雄壯。此足當之。其用充國傳及
禮詩論孟尤稱巧手。

周公必大紹興丁丑詞科以交趾進馴象命題。
就試之上。僅能形容畫象及塑象而已。惟公表曲
盡馴象生意。有云名應周郊之五路。克協馭儀耳。
聞舜樂之八音。能參率舞。又曰靡憚奔馳。幸舍爲

飛之跼跼。無煩教擾。俾陪歌舞之般般。主司驚異。遂中首選。

高宗初一兒三歲。誤爲苗劉所擁。遂爲張浚所殺。自是屢禱燕禱。故詞科以賀皇太子生命題。周益公試卷起云。天祐聖神君萬年。而錫祚祥開。禁掖震一索而得男。結云。使壽使富而多男。方協堯封之祝。宜民宜人而受祿。載歌周雅之章。當時稱其擅場。

有竊後一聯者改作多富多壽而多男對克長
克君而克類不知當時果有多福多壽之祝否

又

周益公初試館職卽以掌制手見稱乾淳間在翰
林凡六年制命溫雅周盡事情爲一時詞臣之冠
有餘禮部侍郎誥云分六職于中臺共釐庶務正
貳卿于宗伯尤號清曹非夫令聞廣譽施諸身前
言○往○行○畜○其○德○何○以○助○我○中○和○之○化○儀○于○侍○從○之○

班久歎才難。盍從試可。朕旁招彥士。盼飾隆平。稽
三王損益之文。閱五季襲泐之陋。禮樂自天子出。
將成列聖之典章。遵豆則有司存。兼采諸儒之論。
議資爾直清之譽。副予制作之官。上而修神天廟。
社之盛容。下而正玉帛鼓鐘之末節。使漢文煥焉
可述。則周道粲然復興。此篇組織之工。已並天巧
矣。

周益公謝除吏部侍郎表云。知人非堯帝之難巧。

壬○奚○患○選○衆○有○臯○陶○之○舉○枉○直○自○分○謝○除○禮○部○侍
郎○表○云○惟○宗○伯○古○之○清○曹○惟○貳○卿○今○之○臚○仕○禮○樂
自○天○子○出○雖○上○稟○于○聖○謨○邁○豆○則○有○司○存○當○俯○求
于○故○實○夫○何○鄙○朴○而○許○攝○承○夙○夜○直○哉○惟○清○莫○遂
夔○龍○之○遜○文○章○煥○焉○可○述○更○慙○乘○馬○之○工○謝○除○禮
除○尚○書○兼○翰○林○學○士○謝○表○云○宗○伯○綴○文○昌○之○座○已
高○曳○履○之○班○翰○林○依○華○蓋○之○星○尚○玷○續○綸○之○直○諸
表○含○經○吐○史○憂○玉○樅○金○一○時○詞○垣○諸○人○皆○歎○以○爲

不可及。

淳熙間周必大除參知政事。謝太上皇帝表曰：雖
含生之類，夙仰戴于陶成。然太極之功，終莫窺其
運用。後進左丞相，謝上表云：惟尹暨湯，雖乏格天
之效。安劉必勃，尚存念祖之心。讀者謂其字字不
苟，具有宰相風度。

周益公謝宮祠表曰：晨趨鳳闕，縮五組之光華。夕
侶漁舟，披一簑之藍縷。又曰：負茲有疾，人多疑茲。

字誤。公後自箋曰。出公羊威公十六年。諸侯有疾。曰負茲茲。新生草也。

凡臣僚上表所稱。臣惟誠惶誠恐。誠歡誠忭。稽首頓首者。謂之中謝中賀。自唐以來。其體如此。蓋某以下亦略叙數句。便入此語。然後敷陳其詳。後人不察。或于首聯之後。奏用兩短句。言震惕之意。而復接以中謝之語。則遂成重複矣。周必大謝復益國公表曰。華陽墨水。裂地而封。舊物青氊。從天而

下磨玷之勤未泯。執圭之寵彌加。臣誠惶誠恐。或以爲疑問。公公答之如此。

史真翁。常有侍講說書官。爲經筵進講。孟子終篇。謝賜金帶牙簡。同侍讀修注官。謝賜御筵及鞍馬。香茶進詩表。題中轉摺極多。最難整次。而史表委曲圓活。有餘采而無澁語。可謂四六中子長其略。曰。逮聖人尊德。以有爲于學問。逢原而自得。細旃晝訪。聆責難陳。善之規。裁弁星環。探知性盡。心之。

蘊華編甫撤。謨問奚裨。嚆侍講說書之勞。暨著記纂修之職。鏐鑿絢采。復攷象齒之珍。玉笋示慈。咸綴麟臺之席。上駟式調于沃轡。團龍交祭于奇芬。稽古所無。省躬莫稱。歸美以報。拜手載朝。贊至聖之大成。述君臣之相說。辭臣約禮。遠希積翠之篇。句寫賜箋。俯效集仙之飲。

史真翁八十。孝宗特遣使賜御筆褒諭。俾介眉壽。又賜金器香茶等物。真翁表謝云。貂璫飛鞚于川。

塗翰墨騰光于龍鳳。謂臣浮生之稀有。又過十春。
祝臣暮齒之再延。俾逢千歲。杯盤羅列。盆盎錯陳。
率皆粟縷于兼金。况乃環裝于百寶。分上方之清。
馥。掇正焙之龍芽。蓋真翁曾侍帝于潛邸。帝卽位。
遂大拜寵錫最渥。故表中復有乾坤長養。父母愛。
憐。自執卷于潛藩。暨秉釣于初政。撫存特異。終始。
弗渝等語。

朱紫陽熹除浙東提刑到任謝表有云。雖駑馬之

十駕後者鞭之。然鼯鼠之五窮技止此耳。按荀子
驥一日而千里。驚馬十駕亦及之矣。又鼯鼠五技
能飛不能上屋。能緣不能窮木。能浮不能深浴。能
穴不能掩身。能走不能先人。是謂五窮。莊子善養
生者若牧羊然。視其後者而鞭之。柳子黔之驢說
技止此耳。只此四句。鎔鑄古詞。何等神妙。世之不
能四六者。類言雕蟲小技。壯夫不爲。孰知前代大
儒乃爾。

二程毓秀黃岡前此祠堂闕焉郡守李訖經始締
創朱晦翁大書扁榜且爲之記李自爲上梁文曰
江趨廬阜而東實接濂溪正傳之派山揖浮光而
北又鄰司馬載毓之邦蓋溫公生光州故名光周
元公隱廬山之陰濂溪在焉光黃江皆鄰州亦異
事也李乃文肅之孫文學典刑固有自云
呂成公祖謙進僊源類譜表有云德隆澤厚命旣
積于萬年胄遠族蕃譜方新于六世此上高宗者

也。前布告手書曰：傳序九君，而此僅云六世者，蓋以帝論則至欽宗已九君，以世論比高宗纔六世耳。嗚呼！以舉族北轅之後，而有此譜牒，可謂於咽乾道初，有自翰林學士除同知樞密院事者呂成公。草譜云：在咸平有若臣旦，在嘉祐有若臣修。擢繇禁林，登貳樞極，帷幄收頗牧之績，樽俎折獯狁之謀，無競維人。式序在位，翰林學士知制誥兼侍讀。某代言溫雅，發號施令，罔不臧勸，誦從容陳善。

閉邪謂之敬。屢訪河西之邊事。咸聳山東之詔書。嘉其知軍戎之情。進而與甲兵之間。爾猷則告我武。惟揚噫夙夜。宥密畢厥心。勿替協恭之助。國家閒暇。明其政。具嚴思患之防。可授同知樞密院事。此語妙在將翰林與樞密紐捏成團。殊無苦色。

宋人又有賀翰林遷兵部啟云。縱橫經庫甲乙。丙丁四部之書。馳驟詞垣。天地風雲八方之陣。凡制誥不稱爲某人作者。以其人不稱也。東萊又

嘗撰中書舍人除翰林學士誥云具官某增主之
明。洋。洋。晁。董。之。對。發。帝。之。令。渾。渾。虞。夏。之。書。休。有。
德。聲。最。于。邇。列。是。用。進。陟。鑾。坡。之。邃。深。居。鈴。索。之。
嚴。近。天。子。之。光。允。賴。謀。猷。之。啟。沃。見。王。者。之。志。通。
觀。詔。命。之。發。揮。此。誥。文。極。清。華。亦。不。稱。爲。作。

呂東萊通張魏公啟有云先知覺後知傳斯文之
正。統。小。德。役。大。德。爲。善。類。之。宗。盟。扶。日。轂。于。慶。霄。
握。斗。樞。于。宥。府。國。家。再。造。高。鴻。烈。于。汾。陽。天。地。重。

問。翊。不。圖。于。建。武。東。萊。與。魏。公。之。子。南。軒。友。善。故。
極。其。推。尊。而。自。叙。處。復。極。其。挹。損。云。每。原。念。于。衰。
宗。嘗。屢。投。于。化。冶。雖。迹。遙。履。舄。莫。仲。磬。折。之。恭。然。
氣。激。肺。肝。竊。効。鐘。鳴。之。應。

揚。誠。齋。謝。提。舉。廣。東。警。聯。云。九。天。曉。日。念。孤。臣。將。
遠。于。長。安。四。乘。秋。風。忽。寵。命。載。驅。于。原。隰。至。于。南。
海。保。彼。東。方。又。云。海。若。祝。融。彈。壓。波。瀾。之。險。朔。雲。
邊。雪。驅。除。江。嶺。之。氛。謝。知。福。州。警。聯。云。米。蘖。自。將。

粗謹酌泉之誓。繭絲是戒。少寬竭澤之嗟。又云政
苟安恬。寧有駭輿之馬。吏無侵枉。誰爲游斧之魚。
若此之類。俱意新調新。大抵宋人四六。荆公謹守
法度。東坡雄深浩博。出于準繩之外。由是分爲兩
派。後來汪浮溪周益公諸人。類荆公。孫仲益楊誠
齋諸人。類東坡。

范石湖成大帥蜀上巳日大燕樂語。僚佐撰呈皆
不愜意。有石生者一聯云。三。月。三。日。豈。無。長。安。麗。

人。一。詠。一。觴。載。講。山。陰。禊。事。公。心。肯。之。

孝宗時上庠試卷時經御覽辛丑大旱七月私試
閔雨有志乎民賦魁士劉大譽賦中有商霖未作
相傳說于高宗漢旱欲蘇烹弘羊于孝武之句時
趙溫叔爲相孝宗遂欲因此罷之會有詔迎天竺
觀音就明慶寺請禱有爲詩者曰走殺東頭供奉
班傳宣聖肯到人間太平宰相堂中坐天竺觀音
却下山溫叔聞之遂乞免

宋初有年八十二。魁大廷者。謝啟云。白首窮經。少
伏生之八歲。青雲得路。多太公之二年。或以爲梁
顥。紹興間。有士子年十九。以詩賦擢第。梁谿費衮
爲作啟云。年踰質誼。亦濫置于秀才。齒少陸機。顧
何能于文賦。蓋二者年齒適相上下也。

櫻玫瑰。鑰草光廟遜位詔。雖喪紀自行于宮中。而
禮文難示于天下。蓋孝廟上仙。光宗以疾不克親
臨喪。遂傳位于嘉王也。又卓立韓后制曰。書稱堯

舜禹之傳朕克艱于負荷詩美姜任姒之聖后宜
謹于儀刑于時吳謝李三后皆在長樂其用姜任
姒可謂精切

樓玫瑰謝除參知政事表有云朝廷建輔號天子
之四鄰政事叅聞下丞相之一等又云負二宜去
有七弗堪宿恙漸侵將籲天而致禱誤恩狎至真
踏地以靡遑句句從肺腸中搜出二宜去七弗堪
何等精確唐孔戣云吾二宜去年老一也爲左右

丞不得進退郎吏二也。晉嵇康七不堪見絕山巨源書。

李獻詞科趙彥中代進國史列傳表云錄公卿而爲世本。肇自有熊傳臣子而易編年。俶繇司馬高崇奎辭免內相兼修史表曰玉堂揮翰譽殊乏于令狐。金匱紬文才當延于司馬。一則詞臣令狐紬一則太史公司馬遷。不惟事精又且對切。視彥中詞科表以有熊對司馬此又勝焉。

慶元初奉孝宗御製藏華文閣詔曰經緯天地道
存渾噩之書鼓舞雷風仁盪盪池之命寫之琬琰
炳若丹青大微三光之庭丕闡鳳巢之勢上帝羣
玉之府遂通龍紀之聯此高崇奎筆

寧宗朝以伐金詔四方凡二開禧詔曰舍垢納汗
在人情而已極聲罪致討屬胡運之將傾翰林學
士李壁之詞也嘉定詔曰犬羊跨我中原天厭多
矣狐兔失其故穴人競逐之與前詔旨大約相似

寧宗朝真西山德秀權直學士院嘗代制置司撰
瑞慶節表云無思無爲化自隆于鼓萬有容有立
德參貫于函三故修齡與日以長存雖巧歷窮年
而莫盡臣馳神拱北將指落南奉萬歲之玉卮遙
想鵷行之隔上千秋之金鑑庸伸鰲忭之恭當時
推其雅秀後來翰苑諸公多襲用之

西山掌內制六年因母請外便養得除江東運使
謝表云輶傳初馳旄倪爭覩謂朝廷所以輟柱下

之○吏○蓋○聖○主○將○以○惠○江○左○之○民○因○博○采○于○風○謠○頗○
究○知○其○疾○苦○賦○難○遽○省○盡○漸○捐○賦○外○之○征○民○未○易○
蘇○當○先○去○民○間○之○蠹○及○到○任○惠○政○深○洽○不○愧○其○言○
寶○慶○初○史○彌○遠○殺○濟○王○于○湖○州○真○德○秀○入○對○極○言○
其○寃○忤○彌○遠○意○爲○梁○成○大○所○劾○遂○罷○直○學○士○院○提○
舉○萬○壽○宮○尋○詞○祿○亦○罷○有○謝○表○云○聖○君○非○不○受○言○
臣○自○疎○于○開○導○國○人○皆○稱○有○罪○上○獨○示○于○矜○容○四○
方○人○士○誦○其○文○想○見○風○采○焉○

真希元謝復官表云自退屏于山林寢遯違于軒
陛憂時之髮益白悵去國之十年戀闕之心爲丹
敢忘君于一飯又謝宣召入翰林院表云修除翰
苑在環除出守之餘軾待禁庭亦赤壁歸來之後
豈非加歲月則其文老涉憂患則其慮長乃登邃
巖以備顧問如臣者才華弗競慙拙自將結茅屋
于雲邊已甘終老瞻玉堂于天上若隔前生敢云
白首之重來誤入清衷之妙簡時彌遠死公再起

用正端平更化初也。

真希元進大學衍義表。曩叨侍從論恩之列。適當
姦諛蒙蔽之時。念將開廣于聰明。惟有發揮于經
術。使吾君之心。炳如白日。于天下之理。洞若秋毫。
雖共兇。雖進于堯朝。豈魍魎能逃于禹鼎。曰姦諛
日共兇。曰魍魎。蓋指彌遠。

凡進書稱頌處。卽竊本書之意。乃佳。史真翁講孟
子表云。恭惟陛下。居安資深。守約施博。覽大賢之

論集興盛治之雍熙德醉從容秩太清之華燕幣
將焉奕邁崇政之彞文臣等職媿寤疑恩沾同樂
讀古書而尚友諒懷望道之思頌清廟以致平期
盡事君之義真希元進大學衍義表云恭遇陛下
乾旋坤轉日就月將方將切磋琢磨而篤于自修
定靜安慮而進于能得事欲明于本末理期貫于
精粗適萃成編冒塵清燕止其所止願益加止善
之功新以又新更推作新民之化二表當並觀

李功甫謁真西山丐詞科文字西山留之小飲書
房指竹夫人使作制功甫援筆立成末聯云保抱
携持朕不忘兩夜之寢展轉反側爾尚形四方之
風西山嘆賞蓋八字用詩書全語皆婦人事而形
四方之風又見竹夫人玲瓏之意其中頌德云常
居大夏之間多爲涼德之助剖心折肝陳數條之
風刺自頂至踵無一節之瑕疵

嘉熙己亥四月誕皇子告廟祀文學士李功甫當

筆內用四柱作一聯云亥年巳月無長蛇封豕之虞。午日丑時有歸馬放牛之喜。蓋時方有蜀捷其用事可謂中的。

王伯厚應麟宋季以博洽稱嘗見臨安進野蚕繭及絲綿紗絹因謂同學者曰萬一以此命題中間將何鋪叙皆相顧無語伯厚擬一聯云縷絲織續無慙禹貢之征冰素方空不數齊官之獻絲綿紗絹四者皆備同學嘆服

嘉靖初黃澗考補野蚕成繭聯云園客抽絲坐
看五色龍精散魄不假三縲被阜以生表漢家
之熙洽食糲而化彰唐室之隆平後聯宋人原
表

漢唐文儒之戲曰客難曰解嘲曰賓戲子虛烏有
之問答翰林墨卿之應酬至韓昌黎作毛穎傳遂
牽陶泓陳玄楮先生得書淳祐間鄭越公清之發
昌黎未盡之蘊託王命山高爵合文房四友例有

除授訓辭甚美。門下客林肅翁希逸。劉潛夫克莊。

各擬謝表。人爭傳誦。林代毛穎謝云。楮知白嘗反。

面。以臣點汗而見疑。石虛中恃能才欲臣流落而。

後。已獨蒙拂拭。未忍棄捐。豈非以內劄施行無漏。

言于片字中。書進擬。或任怨以一勾忠粗竭于毫。

芒。恩久居于掌握。對揚麻卷。幸襲元銳之封。期效。

棗心。時進公權之諫。代石虛中謝云。濡染同勒。愧。

淵源之易涸。氣質難化。知圭角之未除。徒堅石不。

轉○之○心○莫○效○璧○俱○碎○之○報○幸○不○折○于○屢○挫○幾○見○買○
以○一○官○從○我○而○無○所○取○材○小○器○偶○叨○于○承○乏○掌○制○
而○不○善○爲○斲○拙○工○未○免○于○包○羞○劉○代○陳○玄○謝○云○上○
恩○甚○渥○月○輒○給○于○一○枚○舊○學○都○荒○歲○纔○磨○于○寸○許○
研○精○游○藝○摩○頂○酬○知○潤○色○廟○謨○不○假○丹○青○之○力○劑○
量○人○品○尤○嚴○皂○白○之○分○代○楮○知○白○謝○云○臣○無○他○技○
方○虞○劄○惡○之○譏○帝○有○恩○言○廼○示○衮○褒○之○意○委○穆○之○
以○百○函○之○多○餉○張○華○至○萬○畚○之○富○大○事○則○書○之○策○

安能措一字之謹嚴。小子不知所裁。徒自愧成章之狂簡。

縣令之任最難。蓋監司府州之責成。鄉社百姓之爭訟。征歛以供軍國。嚴慎以防吏胥。能否黜陟皆繫于此。宋林崇甫德嘗爲劇縣。有聲其與監司啟云。鳴琴堂上。將貽不治事之譏。投巫水中。必得擅殺人之罪。時以爲名言。劉潛夫宰建陽。亦有一聯云。每嗟民力至。叔世而張弓。欲竭吏能。恐聖門之

鳴鼓語意尤勝。

劉克莊除廣東提舉謝表云。今百端之供億。殆遍國中。餘一髮之本根。獨惟嶺外。方且糴舟之發。銜尾鹺課之收。及膚空熙豐以來之儲。增紹淳未有之額。使賈生之及見。哀痛謂何。雖劉晏之復生。變通安山。乃如臣者。豈其任哉。惟無瑕者。裁人必先已責。以不貪而爲寶。少戢吏饕。廣東提舉卽楊誠齋舊任也。誠齋前謝表。猶有物衆地大。壤沃泉甘。

語。至劉時凋瘵。乃爾。蓋宋事至此。已不可爲矣。

開慶初。元人攻鄂州。急賈似道密遣使請稱臣納幣。元太弟不許。會憲宗計聞而阿里不哥欲襲尊號。乃約歲幣之數。拔砦而去。太弟旋定內難。卽位于開平。改元中統。李仁卿治賀車。駕班師表云。惟聖人必欲去害。肆天子所以有征。衣暫試于一戎。月連飛于三捷。旣多算以勝少算。况至仁而伐不仁。是宜氛祲廓清。車書混一。大統會歸于中統。太

平今覩于閭平。是時胡運初興。其典章文物傾壓中國如此。

孟德卿攀龍賀平。宋表云。國家之業。大一統。海岳必明主之歸。帝王之兵。出萬全。蠻夷敢天威之。抗際丹崖而述職。奄瀚海以爲家。獨此宋邦。弗遵聲教。連兵負固。踰四十年。背德食言。難一二計。崛強心在四郊之橫。草都無飛走計。窮一片之降幡。始豎茲惟睿算。卓冠前王。視萬里爲目前。運天下于

掌上致令臣等獲對明時歌七德以告成深切龍
庭之想上萬年而爲壽更陳虎拜之詞孟故北方
遺老是時幽燕境土陷虜已久見聞習染不復知
宋中華之統不可絕雖劉夢吉四大儒亦作渡江
賦以籌畫忻幸之又何怪乎德卿之謂宋爲蠻夷
也

東昌路賀平宋表是翰林學士徐世隆撰略云蠢
爾三苗之弗率命予羣后之徂征一鼓而定荆襄

再駕而降鄂岳。斬黃面縛。江沔心歸。鉞斧之堅城。
已摧。金陵之王氣。何在楚地六千里。不勞秦將之。
增兵。錢塘十萬家。坐見吳王之納土。僞將悉朝于。
闕下。幼君遐竄于海中。方知恃險而亡。應悔求和。
之晚。世隆嘗以詩哭文丞相。有曰。精忠貫日。華夷。
見氣節。凌霜天地知。似非昧于春秋。內外之辨者。
表中亦云。弗圖島夷。輒拘使節。蓋可浩歎。

元人賀登極表第一。推虞伯生集賀聖節表第一。

推鄧善之文原賀正旦表第一推夾谷士常之奇
賀親祀南郊表第一推謝敬德端虞表云鴻業啟
圖世守肇基之迹龍庭受賀躬膺大曆之歸中聯
云立長式遵于家法計宜允協于輿情車服旌旗
皆我祖宗之舊星辰河嶽赫乎宇宙之新末聯云
臣等叨承重任適際昌期建皇極以敷言親揚葵
訓坐明堂而布政永贊成能鄧表云天開景運篤
有道之曾孫電繞神樞受介福于王母中聯云至

仁育物得秋而萬寶成盛德在躬居所而衆星拱
末聯云臣等名叨玉署目極璇霄廣文王有聲之
詩載歌律呂衍殷宗無逸之壽虔祝華嵩夾谷表
云位拱少陽仗簇黃麾之曉氣暄大簇祥開青禁
之春中聯云重明繼照陰邪常遏于未形九四在
淵陽德克潛于已著茲履端之云始宜介福之孔
多末聯云臣等素乏長材叨居端尹星輝海潤莫
酬沾被之恩月恒日升第祝綿延之算謝表云四

方于理。事天致恭已之誠。三年而郊。卜日叶用辛。
之吉。中聯云。大呂黃鍾音。協雲門之奏。鎮圭縹籍。
輝聯蒼璧之華。祥風和氣之與游。景星慶雲之疊。
見。末聯云。臣等叨佐清朝。欣觀熙事。列園壇之八。
陛。幸陪漢時以侍祠。陳泰階之六符。願舉兕觥而。
上壽。勝國一代文章於斯爲極盛矣。
表涉一代興廢。不可無斷制。歐陽原功。玄進宋史。
表云。聲容盛而武備衰。議論多而成功少。可謂盡。

之。我朝丘文莊公濬爲祭酒時出元史表云。非無一善之可稱。終是大綱之不正。自謂不減前語。世亦以爲信然。

宋以仁厚立國。不幸侮于遼。肉于金。亡于元。然人心終有不忍忘者。初宋亡。宗室有遺落中山者。衆共立爲主。期欲興復。不克而滅。元末韓山童自言祖父係宋胤。國亡變姓。汝穎兵起。卒推立爲主。山童敗。子林兒稱宋帝。亦十二年。其他所在兵起。皆

以興宋爲詞。而紅巾揭旗有聯云。虎賁三千直抵
幽燕之地。龍飛九五重開大宋之天。此見宋仁厚
之德。入人之深。雖易姓未泯。蓋漢唐以下所未有
也。